

E recién Concierto Dominical "Donny Lacle" tabata varia y di nivel halto



ORANJESTAD (AAN): Diadomingo, 28 di september 2014 esnan presente den "The French Steak House" di Manchebo Beach Resort & Spa a disfruta un biaha mas di un concierto hopi varia y di un nivel hopi halto.

Manera semper e concierto aki a tuma luga di di 11 or di mainta te 1 or di merdia.

E prome grupo cu a presenta tabata Coro La Escala bou guia di Hector (Chichi) Pérez. Coro La Escala ta e coro cu a keda funda door di señora Maruja Forero (den feliz memoria) y ta consisti di 17 cantante y musico. Na a presenta un repertorio varia di canticanan crioyo di entre otro Padu Lampe y Bernadina Growell, como tambe canticanan di nos paisnan bisiña. Nan a pone un ambiente dushi y alegre den e sala di Manchebo.

Despues a sigui Gisele Sint Jago Combo, consistiendo di Gisele Sint Jago, for di 2008 cantante di jazz, compañía riba piano pa Dirk Rukkers, interpretando diferente cantica di jazz, entre otro e conocido "Summertime". Aunke esaki tabata e prome biaha cu e duo aki a presenta pa publico, tur hende a keda impresionado di e forma profesional cu nan dos a presenta. Esnan cu a no tabata presente diadomingo y esnan cu kier mira e duo aki presenta un

biaha mas hunto cu Teddy Philips: Dia 18 di october Gisele Sint Jago Trio ta presenta su prome concierto na Cas di Cultura.

Finalmente nos a haya presentacion di Chencho Kelly y Grupo Zjilea. E grupo aki, cu ta consisti di trahadonan di Biblioteca Nacional, reforsa cu algun musico a forma un grupo musical, bou guia di Chencho Kelly, un percussionista conoci, pa brinda presentacionnan na e casnan di nos grandinan. Y nan a dicidi di brinda e bishitantenan di e Concierto Dominical un presentacion, consistiendo di canticanan crioyo, manera Un Baca Flaco, Ban Baile, Cunucu di Seit, percurando asina pa un tremendo ambiente. E publico a keda encantado te cu nan a pidi pa mas.

Despues di cada presentacion cada grupo a haya un certificado di aprecio pa nan participacion na e concierto. Entrada na e Conciertonan Dominical ta gratis pero den pausa ta pasa rond cu un caha di glas den cua por haci un donacion.

Fin di aña Fundacion Donny Lacle ta usa e donacion pa yuda un of mas talento local financieramente cu nan estudio di musica.

Otro luna Concierto Dominical Donny Lacle ta tuma luga riba diadomingo 26 di october.